



85.



DEO OPTIMO MAX.

UNI ET TRINO,

VIRGINI DEI-PARÆ; ET S. LUCÆ,

Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS,

*manè discutienda, in Scholis Medicorum, die Martis quartâ
mensis Martii, anno Domini M. DCC. LXXVII.*

M. JACOBO-ALBERTO HAZON;

Doctore Medico, Præfide.

An à præceptis diæteticiis vita felicior ?

I.



UNIVERSI ad felicitatem tendunt homines; unus quidem ejus amor, sed non via una est omnibus. Alii dulces inter epulas, ac regna vini; alii inter vitæ tranquillioris otia felices se credunt futuros, spernuntque invidiosas opes & aulæ superbiam. Rectius porro ad scopum collimat qui solidioribus inhiat bonis, neque pro felicitate ipsâ captat inanes tantum ejus umbras. Si quæ igitur diversas inter orbis hujusce procellas affulgere queat homini felicitas, etiam in me-

dicæ artis gremio reperiunda est, cui nihil præstantius incumbit quàm corporis atque animi sanitas. Nullus tamen aut frequentius error accidit, aut magis temerarius est, quàm illorum qui conjunctam medicæ in vivendo prudentiæ miseriam existimant: neque mirum: nullus enim Medicum se non credit; habentque omnes suos de arte rarissimâ quos proferant aphorismos. Clamitant scilicet miseros medicinâ fieri homines, dum spectant quosdam artē male-suadâ sibi nocivos, exesum libidine pusillè torquentes corpusculum, semperque medicamentosè citra necessitatem visitantes, non suadente, sed invito ac talem medicinam deprecante Medico. Docent præterea Philosophi « plures à Medicis afferri quàm sanari morbos: » ex eorum arte credulitatem oriri, segnitiam vecordiam, ac mortis formidinem; » hæc si sanentur fortè corpora, saltem frangi animos; ex eâ sobolescere non viros, sed virorum cadavera, &c. »

Nos verò, Genus Apollineum, usquequò demùm artem fonte nobilem, necessitate venerandam, præceptis perutilem, doctrinâ inconcussam, in dedecus afferri patiemur? Hanc vindicare ab insanis plebeculæ dictis, hanc à præconceptâ sapientium virorum opinione criminibusque eruere nostrum munus est. Sed sola errores discutiat veri luculenta expositio; artem ipsam commonestremus legesque ejus diæteticas; hisce dein penitus, patebit è medicâ moderatione leves quidem, sed puras & constantes, quantum fragilitati humanæ licet, enasci delicias vitamque feliciorē.

I I.

ARS Medici duplex: alia quæ sanitati conservandæ invigilat, & est *hygieine*; alia quæ lpsam refarcire studet, ac *iatriam* vocatur. Hæc si miserum videatur reddere hominem, non idè causa est infortunii, sed à morbo eam requirente tota exsurgit calamitas. Horrorem, fateor, quandoque ac fastidium præ se fert; sed his etiam finem sæpe imponit, & si quando sæviat, hominum benè dilectrix, piè sævit; sive enim propinentur pharmaca, sive acies amica morbo interiora devastanti pandat iter foras, citò quantum potis est, tutò ac jucundè operatur; tali sæpè omissâ curâ malum ingravesceret, summumque inde nasceretur ac immedicabile infortunium. Usque adeò cogit eam dura necessitas! Illi verò miti semper, nunquam dolorificæ, non alius laborum finis, non aliud præmium, quàm longæva hominum felicitas. Nulla Medicinæ pars firmiter innititur fundamentis, nulla certior, nulla generi humano proficua magis, nulla ingrata & fastidiosa minis. Solâ enim moderatione in usu rerum jucundarum,

arceat morbos; doloris, luctûs ac tædii præcipuos fontes; & sanitati consulit, quâ nihil ad felicem vitam optabilius: nec quibusdam tantum affulget oris fidus amabile; suo etiam influxu universos cunctarum regionum incolas, universas omnium hominum condiciones tuetur & beat. Studet ut inter diversos labores, diversos vitæ status, sanus pro suâ quisque parte felixque possit vivere. Docet quo regantur aulici victu, quem sequantur rusticolæ; quid profit militi, quid operis, quid singulis artibus; nascenti prospicit viro, regit adulti labores, manum amicam titubanti largitur senectæ. Dat sua sexibus jura, dat sua climatibus; quid gelido Lapponi, quid perusto Nigritæ conveniat, quid sub constanti amicoque Asiaticorum coelo, quid in variabili Europæorum patriâ, statuit ac temperare amat sapienti legum discrimine. Universos mente unâ complectitur, indefinenti perlustrat oculo; singulos singulari consilio monet, debito omnes adjuvat præsidio. Sed ingrata soboles quàm dîrè matrem blandissimam plectit! Quàm atris excipit tot tamque jucunda munera conviciis! Ah! cæci, mammas uberiores ne cædatis; arborem abstineatis eruere, quæ, sæviente brumâ, triste offert spectaculum, nescii quale mox præbitura sit hospitium, quàm opimas datura fruges! Potiùs adeste, mortales, benignam hanc parentem propiùs intueamini; divina udite pandentem oracula.

I I I.

PURUS sit aër, levis, semper novus; ex oris borealibus & ab oriente puriores flabunt venti; humidioris austri cave pestiferos æstus. Sic domos, sic urbes extrue, ne maligni paludum vapores, ne minerarum halitus vitalem auram inficiant, Ibit feliciùs per ædes patulas aër liberiori cursu assiduò mutatus: id præcipuè miserum in castris militem juvat, tristesque pauperum casus & ægrorum recessus. Accende focos ex aromaticis, maximè prope domos, intra domos. Nascatur in ambitu, ex plantis aura purior; foetæque male-sanis miasmatibus atmosphæra salubres recipiat vegetantium particulas; extra oppida sita sint carceres & nosocomia; longè à viventium cætibus effodiatur tellus ad condenda cadavera, æquales Pauperum, Magnatùm & Heroùm reliquias.

Sobrius ac temperans esto; sed firma firmis, otiosis parca, plura plus exercitis dentur alimenta corporibus. Ne publicis nimium servias usibus; cunctis scito assuescere; vites autem severum consuetudinis imperium. Paucis utere, sed indiscriminatum omnibus; nec inediâ tuæ ruant in interitum vires; nec copiosiori cibo graventur ultra modum; nec diutiùs protrahatur mensa, nec ore vora-

ciori cibi deglutiantur. Vanescant tibi fallacia famis irritamenta ; sit pro condimento labor ; simplex tibi sit , præ multiplici , dapum apparatus ; parva est exercito ciborum differentia ; farinæ , olera & fruges , nedùm duros vinitoris artus debilitent , augment & roborant. Urbano misceantur cum carnibus vegetabilia. Fermentatis laud cedat liquoribus pellucidus latex ex amne decurrenti crebris haustus vicibus ; vino tingatur in debilis tantùm gratiam ventriculi ; nec mero utatur , nisi sudore madens. Phlegmaticâ turgentem colluvie Batavum tumidamque juvat tabacus coryzam. Illi tantùm bona thea est quem falsa fefellerunt mensæ gaudia ; coffæa somnolentum excitat ac subdit fegniori ventriculo stimulos efficaces. His igitur medicamentis potius utere quàm alimentis ; usum dicet necessitas ; quæ nisi imperet , fuge fallaces delicias.

Alternæ sese excipiant vigiliæ & somni , laboris & otii vices ; sedeat ab exercitio , quicumque duro fractus labore vires amissas revocare amat. Litteratus autem & absque motu laborans lusioni indulgeant animum corpusque benignè reficienti ; rusticentur , obambulent , pilâ exerceantur , saltu cursive , ad primum usque defatigationis sensum ; equitent præsertim , aut supra concretum amnem rapidè vehantur. Modicæ corporis motiones à pastu juvant ; perturbant enim violentæ digestionis officium. Tunc & à studio cave & ab animi intentione quâvis ; sed nec sede otiosus. Labore nimio si fracta ruat compages , quantò pejor deses otiosaque vita , non sanitati nociva minus quàm moribus ! nocet præsertim homini valdè olim exercito subito instituta ; ut qui languebat iners , labore vel minimo brevi prostermitur : quævis enim subita & insignis mutatio , ni maturè assueveris , summè mala.

Somnum nox placida accersat , affulgens absolvat dies ; sol vigiles artus reficiat ac roboret ; nec pervigilet , nisi in armis miles , aut Medicus propter ægrorum cubilia suam sanitatem spernere gestiens : nec meridiare , nisi quiete nocturnâ antea defraudatus , aut ubi nimio solis æstu resolvuntur artus , Italo Hispanoque more. Studenti , laboranti , macilento somnus paulò longior sit , obesis parcior : annis sensim fugientibus minuatur ejus duratio. Duro potius quam molli , ex paleis aut crinibus , potius quàm plumis , lanis gossypii sive instructo , levius quàm gravius obrecto , utere cubili. Nec inibi sudes , nec algeas ; nec ligatis artubus capeffe somnum , nec decliviori capite , nec vultu sub stragulis condito , nec in loco humidiori , nec intra densam adulteramque zetæ obscurioris atmosphæram.

Ut corporei motus; sic moderata profunt, nimioque aut pravo tantum usu nocent animi pathemata; ergo nec furore mens efferatur, nec amore depereat, nec contabescat odio vel livore, nec deficiat metu, nec mœrore conficiatur; sed tui compos esto, tuæ mentis arbiter. Quidquid tibi evenerit, nec timidus esto, nec audax, sed prudens. Sine te probari infortuniis; scito adversis ut secundis uti rebus; mentem quippè ærumnis exercere, ac labori indurare corpus, æquè necesse est; hoc ne improvviso labori cedat impar; illa, ne angore ac molestiâ superetur imbecillior. Frontem exornent mansuetudo, pudor & mentis amica serenitas. Nativa morum virtutumque sympathia dulces diu probatæ amicitiae, dulciores amoris innocui nectat sola nodos. Amor talis, amicitiae connubium expertus artus roborat, exhilarat animos, curas vitæ dirimit, spondet patriæ cives, mundum perennat.

I V.

EA sunt Medicinæ præcepta. Non hic igitur ex amaro fonte sanitas est haurienda; neque est difficilis ea sapientia, neque asperum calcât iter ac humanæ felicitati impervium. Sed cuncta minime arident omnibus: laudatur ille quidem putidas qui urbium auras deferens, rurales captat impollutas ac sæpius fetas balsamicis plantarum halitibus. Verùm cuicumque sobrio ac temperanti, solâ condiente fame, simplex ministratur ac frugalis mensæ apparatus; dapes exquisitè jucundas is nescire arguitur, voluptatisque expers ac proinde miser habetur à plurimis. Nùm verò reapsè miser? Litem tu dirimis, memorande *Cornaro*, tu dum austerè sobrius fuisti, longè felicior, quàm antè regales inter epulas. Neglectis enim verò palati deliciis, potiora admodum solantur sanitatis rarò vitiatæ constantisque animi gaudia: paucis uti consuetus in modico felix est; exquisitiores nescit gulæ delicias; sed cùm nulla ignoti cupido, nulla proinde spontè abstinentis vera est penuria, nullusque infortunio locus. Audeat mox fortuna invida dolos ei nectere, fortunam ridet stans immota rupes, sui compos, fato major.

Sanitatis verè cupidus quantum ab hisce differt qui susdeque omnia vertentes, ludis diem otiove, noctem verò studiis aut laboribus impendunt; qui mensam ludovæ integris æquantes noctibus, seram dein quietem longos in soles producere amant, veterno obruti, sibi, suis & societati graves! Quod resarciendis sufficit viribus, id & illius voluptati sufficit; nedum lucente Phæbo, vigente naturâ, jaceat defuncto similis, suavi potius gaudet ridentis spectaculo, recurritve

lætus ad solitos conditionis suæ labores : & suomet labore felix mihi videtur. Hunc enimverò dum certis componit limitibus , utiles moderati perspicit , & nimii nocivos effectus præcavet , usquè prudens , arti obsequiosus & felix. Nec satis ; sapientem vel in minimis illum deprehendes ; sudore madens , agendo , vestesve commutando hujusce repulsi vitat pericula : sponte urgentibus stimulis excernenda emittere festinat , salivamque utilem pravo more fugit expuere : mulier prægnans aut puerpera fluentibusve catameniis , nocituros in præsentis diætæ errores amovet ; ideòne hæc misera , ideòne miser ille vocabitur ?

Nescit venerem placidus Minervæ cultor ; suæ sunt enim Musis deliciæ ; labor cupidineos arcus dirumpit , ejusque venenata sæpius obtundit spicula. Rarò à sanis celebrata venus fortiores progenerat viros ; ergò casti dum conjuges eâ pariori , fervidiori saltem & utiliori gaudent ; utque opimæ dapes ori inassueto jucundiores videntur , idem esto judicium de cæteris sensibus ; usu quippè hebescent sensus omnes ; modus verò pretium addit rebus. Recenseas nunc , si possis , quascumque sprætæ moderationis leges edunt turbas ; hic adsint amara febris , nodis horrescens podagra , gravis apoplexia , torpor iners , cadaverosa tabes , lues cupidinea , ferox hypochondriasmus , nervorum malorum iniferanda cohors , & quæ innumera silentio premere satius est. Felix igitur quem tot fugiunt luctus , tot fastidia , tam diuturni vixque sufferendi dolores , fugacis gaudii tristes reliquæ ! Felix qui virtute valens pectus gestat telis cythereis impervium , amoremque sibi subdit magis , quàm illi subditur ! Felix tandem qui rebus in arduis æquam servat mentem : qui à fame & siti , laboribus & pervigiis , ab æstu & frigore nil metuit , nulloperè immutatur , assuefactus omnibus ! Neque id à moderatione valdè alienum putes ; ea sunt enim sanitatis athleticæ jura , ut quæ imbelli mulierculæ nimia , ideòque nociva forent , modica levique videantur duro militi. Prætèrà vocante officio , sancita artis transilire licet ; se-ipsam pro republicâ spernere quandoque decorum est.

V.

NULLO unquam magis quàm præsentis ævo juris publici fuit Medicîna , obijciunt plurimi ; nullo tamen crebriores viguère morbi ; nullo fragilior sanitas , vita hominum debilior. Audias , quæso , calamitatis originem : ubi primum desidia & luxus Romanos occupârunt , pejores hoste barbaro ! ubi mille vitia hos contaminârunt , ecce & incubuit pallida morborum cohors & fractum naturæ robur effœtis corporibus evanuit. Constat porrò à pari fonte scaturiisse apud nos

impura morborum flumina : quos oppositis aggeribus sistere debuerunt sanè Medici ; cunctas igitur suæ artis opes miserando hominum generi largâ manu profuderunt. Felix si sapientibus temerè non usum fuisset horum consiliiis ! At Charybdi vitatâ , statim in scyllam incidit ; plerique enim plus de fovendâ pelle solliciti quàm de roborando corpore ac motibus animicomponendis , mala malis adjecerunt ; hinc pusilla mens & tam facilè commovenda , tam mobiles nervi , tam facilè immutandum corpus ; hinc tot turbæ , tetra vitiorum , non artis hygiasticæ progenies !

Vita medica , juxta alios , perpetua est sollicitudo : nùm verò studium adeò grave , miram adeò ingenii subtilitatem perpetuamque animadversionem requirit optata sanitatis conservatio ? Lex simplicissima incumbit , *ne quid nimis* . Naturam ergò sincere interroges ; nec eam stimulo intendas , nec refrenes ultra modum ; huic benè obsequiosus , ejus interpreti medicinæ sat famulaberis ; sic & sanus eris & felicissimus .

Judicent nunc periti , nùm *plures afferat quàm sanet morbos* , quæ tota est ut morbi à terris in perpetuum exulent , & cujus si vigerent præcepta , forent illi saltem rariores . Judicent nùm *ed frangantur animi* , quæ mentem & corpus æquè exerceri , laboresque ac ærumnas æquo animo jubet , suffferri non studiosa minis athleticos , quàm cives sanos efficere . Judicent demùm , nùm è *Medicorum manibus exeant pro viris , virorum cadavera* , nisi priùs libidine exaruerint corpora , sibi que ipsi homines proprias manus attulerint , damni sui , suarum ægritudinum nimis , ingeniosi artifices . Contrà ex dictis patet quanta sit artis diæteticæ dignitas , quàm puris constet legibus ; quantum roborando corpori & menti informandæ profuit ; quantum , pro suis cujusque partibus ritè observata , ad hominis sanitatem felicitatemque conferat :

Ergò à præceptis diæteticis vita felicior .

Proponēbat Parisiis MICHAEL-FRANCISCUS DE LAPLANCHE , Parisinus ,
Saluberrimæ Facultatis Medicinæ Parisiensis Baccalaureus , Theſeos Auctōr ,
A. R. S. H. 1777. A SEXTA AD MERIDIEM .